

民國華縣志

鞏縣志卷二十五

邑人 劉蓮青 纂輯

張仲友

邑人劉鎮華鑒定

邑人劉鎮海參閱

固始萬自逸讐校

文徵三

蒲泉記

清 張凌雲 邑人

南山之南有蒲泉去菩提之梵宇僅數十步許戊辰春養疴來此避俗囂焉泉四圍環山而背豎百仞危壁據高俯下抱險負絕礪礪懸探岫岈岈而僂立泉出其下而東

鞏縣志卷二十五

文徵三

經川圖書館刊

走萬石上奔流噴薄水石相嚙處處作建瓴聲地少低輒蜿蜒下注為小瀑布陡折而北乍深乍淺與層巒疊嶂相潏洄映帶兩岸野卉抱石叢生藤蘿鬚髮蒼翠剝不絕居人則旁西穴處築岸成砌引活渠到圃以灌時蔬可續風什之盤澗焉噫造物之為此幾何年矣古今來湮沒而不彰者可勝慨哉余家石窟寺西偏洛水環繞而時有俚句荒吟不一復肄業于蓮山寺之巔北望大河一線而作蓮山賦以唐突山靈此則一道飛流停泓澎湃于累砌叢嶺閒怪石瑰異如雲如岫如負如戴巨如 細若 卵立如龍馬蹲如虎豹卧如斷鰲聚如結廬他若巖者穴者

覆釜者幕列如懸者經盤流澆灑之處聲錚錚如擊金音
珊珊如鳴絃幽深寂歷誰其一浣塵容者臨斯泉也尋溪
選勝隨意拜石志在高山杳然流水宜雨宜霽宜風宜雪
宜彈琴宜詠詩宜長歌大呼宜科踞袒裸宜跛踣藉睡宜
逍遙偃坐以永晝宜忘歸以卜夕宜偕同人執友各帶太
古風雨之氣爲虛谷靜穆之容一唱三歎若歌若答颯颯
乎清越激昂不知返照之在東峯也昔王摩詰山中與裴
迪書云非子天機清妙者豈能以此不急之務相邀然此
中有真趣矣無忽是說也吾其俟之

羅浦仙姬列傳

張凌雲
人 邑

仙姬江南姑蘇人也生遇不淑沒爲羅浦水神歲癸丑予
讀書淨土寺偶爲扶鑿之戲姬降壇自敘生平乞予立傳
予聞而異之爲輯其略云姬柯氏名阿繡娟娟其小字也
七歲而孤依外祖竹溪公口授唐詩卽了了嘗命賦桃花
有句云自憐春色留難住不是東風故薄情竹溪公曰是
兒有宿慧但福薄耳年十三外祖沒家道落姬爲無賴子
誘去鬻於臨邛臨邛故狹斜地姬處其閒淡如也同輩教
以歌舞謝弗爲強之乃喟然曰綠綺可親庶幾在高山流
水閒乎因學琴通五十闋每當清風明月供瓶花一枝爐
香一縷鼓一再行泫然泣下自呼曰阿繡阿繡竟墮火坑

耶回首故鄉雲樹渺然父兮母兮畜我不卒紅顏薄命夫
何使我於此極也姬自念失身青樓此身無復他望惟賦
詩自遣積八百餘首一一以蓮花箋書之什襲篋笥冀遇
知者然卒不可得遂鬱鬱而卒一靈不散往來風月之下
會羣仙考校人間詩文見姬集成稱善召隸仙籍司水府
爲羅浦水神姬旣以情死生前冤鬱無所發洩及爲神不
廢吟詠喜以詩詞相贈答方其初降壇也適有飛花墜案
下姬強余聯句云已嫁東風別路賒可憐殘影又天涯關
山歷盡渾無著一縷香魂逐落霞嗣後每至輒作綺語放
誕風流不自知其情之一往而深也予戲以尺素焚邀之

是夜遂夢姬冉冉而來戴芙蓉金鳳冠著金縷絳綃氅足
跋雲霞履手持桃花一枝妝束雅淡褰幃微笑予方驚愕
不已忽有雲鶴一唳遽然而覺但見殘燈明滅紙窗風聲
徐徐若有彈指而泣者詰朝問之憮然曰吾與子緣盡於
此矣復何言因泣下欵欵作按梁詞一闋以誌別詞曰佳
期不定似風翻荷珠乍傾秋蛩細訴一片離別情吹羌笛
漁舟浪生敲碁杵雁樓人靜喚覺江郎縱夜永還祈閨一
更自是遂絕余追念不已復作憶柯娘四絕中有句云記
得佳人留別句崑山一曲按梁州蓋實錄也姬性善謔浪
喜與文人唱和初與予狎咸錄以示予多佳句予每暴諸

同人稍稍傳於世然所著八百首竟不傳

太史公曰才子數奇佳人命薄豈不信哉姬抱黃絹之才墮身青樓少年隕命玉樹長埋冤已一旦陟仙班司水府復出其幽光豔影遊戲塵埃以洩其不平之鳴抑何奇也予以迂腐書生竟邀一顧卽青雲之知亦復何加而塵心未盡唐突仙靈不得嘗伴香潔可勝惜哉

正情集序

李夢蛟

邑人

詩以理性情讀詩者然作詩者亦然余質魯於道無從窺尋喜怒哀樂愛惡欲往往形於詩以自驗其得失時久多散軼存者錄爲一卷題之曰正情集或有見而訊之曰子

自謂能詩乎曰否然則胡爲其作也曰詩也者夫豈容以不能辭哉昔黃樞嘗言有天地有萬物而詩之理已具又言嬰兒之嘻笑童子之嘔吟皆詩之情而未動王通言詩出於民之性情性情豈能無哉然則以有性情之人值已動之時有可言之理而顧欲以不能辭也可乎不可乎且子所謂能詩者不過曰三百耳漢魏耳唐宋耳何不思三百以降已不能復爲三百矣漢魏以降已不能復爲漢魏矣此世之氣運爲之也古與今固難強同也然漢魏不能爲三百而漢魏要皆由心所裁唐宋不能爲漢魏而唐宋亦皆本志而成此人之性情爲之也古與今實未有異也

氣運不可爭性情堪自持吾之爲詩如是而已如曰爾爲三百爾爲漢魏爾爲唐宋固我之所弗能亦我之所不願也訊者不言而退余因書是語于篇首

清敕授文林郎汝寧府教授景沂王公暨魏孺人墓

誌銘

劉凌漢

邑人

景沂公爲余執友皆舌耕及公捷南宮司鐸汝南余亦以大挑司鐸小黃乙未夏接公訃音悲歎良久憶公言貌耿耿不能忘余又自湖南九溪改就宛郡教職壬子告歸公哲嗣將葬公持公行述請余誌墓以余知公悉不獲辭也公王姓諱又曾字景沂號嵩峯曾祖諱復伸由吏員選巡

檢未就祖諱俊級父諱謨郡庠生本生父諱閻皆以覃恩贈文林郎如公職祖母氏閻母氏李本生母氏張亦皆贈孺人父兄弟四父居長本生父居三生公同懷二公居長少而家貧性嗜學耕耘負擔之際吟誦弗輟膏油不繼嘗映月冬則映雪映爐嘉慶癸酉歲遭饑饉饗殮不給展卷輒忘三十餘始入邑庠旋食廩餼道光壬午舉於鄉遂聯捷成進士以張太孺人年高改就教職任汝寧府教授時學校之設人多視爲虛文公獨以素餐爲戒日進諸生而訓以身體力行之道次及讀書作文之法有貧不卒業者召之署中飲食教誨情意不倦前後在任七年未嘗以一

事干縣令壬辰汝南遭水災公憫人饑困謀於縣令施賑濟凡事不敢諉於書吏必親自檢點時天寒大風卓午猶未朝食歸署得中風疾連綿數年竟以不愈初公之貧也事父母及本生父母甘旨無缺及公之仕也惟張太孺人在堂迎養署中朝夕問視愉悅異常丁亥丁張太孺人憂數日內鬚髮盡白哀毀之狀不可言傳友於弟析居後錢財未嘗分也生平不矜情不飾貌寬平和易藹然可親嘗曰能使人負我勿使我負人蓋其天真如此當公任汝南余任小黃數以書札往來意以公之得志晚而受福益久乃寒毡甫坐痼疾遂生冷衙清齋半憂困於病榻藥爐之

際年未週甲遽返道山修短有數良可慨也夫孺人魏氏勤儉性成使公無內顧憂信可爲公賢內助矣公生於乾隆四十六年十月二十二日午時卒於道光十五年四月二十三日寅時享年五十有五魏氏生於乾隆四十七年四月初七日子時卒於咸豐二年二月十二日子時享壽七十有一敕贈孺人子一裕甲廩生女二長適李次適蔡後孺人六日而沒孫一穆淳幼銘曰
質直其性樸拙其容襟懷落落氣象邕邕積詩書之府而無機巧之胸可以挽近習而唯古道之從

清特授修職佐郎例地封文林郎慎軒張公墓誌銘

劉凌漢
邑人

公諱凌雲字翰起號慎軒始祖鹽監公金季令於鞏遂家焉嗣後歷居台衡纍入鄉賢與元代相終始數傳至公曾祖諱宗禹祖諱養民公父國學生諱作睿字述之耕讀延世公生而醇篤長益孺慕述之公年逾六旬得瀉疾嘗夜起公晨昏侍側十餘年如一日迨父母相繼逝公喪葬謹循家禮嗜讀如炙穎異聰慧前輩杜漢升先生深器之旋遊泮食餼奈數薦不售先達俱爲惋惜而公怡如也教授生徒幾五十年學者口稱先生如胡安定門人之於安定也主講東周書院六年學徒愈衆一時知名士多出門下

前後擢巍科者八九人課讀之餘輒肄力詩古序誌歌行不下千餘篇藏於家性嗜酒每酣飲相與論經古侃侃直陳如數家珍余初習舉業每就質而公終不以長者自居其謙退類如此生平儉於自奉而厚以待人族中貧無業者必給以謀生之資鄉里困窮者量力周恤公以明經終末年部選邾縣訓導報到時而公沒世矣嗚呼以公之才學竟艱於一第是亦數之奇也然而積德者昌後公長嗣菊圃公丁酉賢書公猶及見之甲辰大挑二等歷署封邱汲縣陳留學篆次嗣君亦早食郡餼孫輩絡繹補諸生天之報施豈或爽哉德配康孺人幼毓名門克相夫子六旬

餘猶紡績不輟家人勸之弗顧也副室朱氏生第三子而遽卒公生於乾隆三十年七月二十日卒於道光十九年三月二十五日康孺人於乾隆三十年五月十八日生於道光二十一年六月二十二日卒子三長志省卽菊圃公也次勗淳郡廩生三志箴太學生道光二十八年染疾卒孫六穎增生栗庠生獲志省出耨畬勗淳出耒志箴出俱業儒女一適白門孫女五長適馬次適賀次適馬曾孫女四今將卜葬於三月二十七日公嗣走倅囑余銘余與公交最密知最詳其三子爲余壻不能以不文辭爰繫以銘

銘曰

溯前代之輝煌兮榮名丕著維世德之繼繩兮家聲不墮
仰品誼之清淳兮絕羣軼類佩學問之宏深兮經經緯緯
羨桃李之競芳兮德業廣被卜遺澤之流益無窮兮子子
孫孫相承於無替

邑故鄉民白新有妻康氏節孝碑

劉凌漢

邑人

節孝婦康氏清庵公之次女也婉婉性生幼嫻姆教年十六字白門十九歲于歸家貧夫新有力農氏操井臼勤紡績佐之舅翁先逝姑于氏夙嬰疾病氏侍湯藥未嘗怠歲饑令夫典粥奩衣以供母隆冬盛寒體嘗無完衣而姑不缺于養及姑卽世哀毀盡禮竭力殯葬姑幼子新純時甫

數齡氏躬親撫養如姑在時歷六霜而夫沒僅遺一女三歲而殤葬夫訖母家議奪其志而氏之死靡慝誓以身殉第念有弱叔在零丁孤苦無親可依恐失其所而白氏一線將斬乃不卽死偶歸寧父母復伸前議兄嫂微諭之姊若妹並愆慝之氏不許信宿卽攜叔歸新純稍長或有以遠嫌諷之者俱不應獨行其志勤苦倍初往往漏三下猶聞機杼刀尺聲積數年得金若干爲叔成室課新嬪以女紅越期氏乃喟然歎曰予所以稱未亡者徒以弱叔耳今叔已成立粟主有依中饋有託復何所憾遂一至母家陰爲訣別還聚叔與婦歷敘艱辛屬以家政仍歸房夜績叔與婦不及察旦省之門不啟而氏已自經死矣時年三十有三蓋丙戌歲六月十七日也嗚呼以氏之居貧養姑備歷艱苦雖古傳淮陽陳氏無錫范氏殆不是過其冰心雪操視死如歸與夫割鼻毀耳截髮斷指諸賢婦迹不同而志則同也至若撫育弱叔俾克成立從容經營卒延白氏視世之慷慨赴死者又何如耶氏沒之二年新純生子同升爲氏繼承其鄰里焦君嘉言謝君元周等憫氏之志高氏之行謀列其事實於貞珉以誌不朽囑序於余余不文而竊與諸君子有同心也爰濡筆記之以俟他日輶軒之採擇云爾

哭李元閣文

名麟圖

劉凌漢

嗚呼元閣吾友竟溘爾而逝耶吾乍聞之且疑且驚疑其未必然而驚其或然耶天下事之不可知者乃如斯也客歲聞君家居有病屢服藥後訪問知已能出門前四月初旬宋表兄位西自省到陳留言與君同寓照豐舖君夜嗽飲食頗少余以爲或一時冒風不以爲意嗣後有自家鄉來者並未言君病突聞凶信嗒然不自禁乃強酒少飲輒大醉昏迷不醒人事間日稍安欲敘與君交情苦不能下筆又不能止仍佐以酒敘其大略憶壬戌歲與君同受業於房三老夫子始相識同一小齋東西分座時余年逾弱

冠君少余五歲余善睡懶誦讀君雖髫年卽苦心經典每至丙夜始息君亦不余棄謬爲知已言無所隱余已重君爲大成器後離羣數年至戊辰春偕君赴周南書院肄業未及甄別君卽歸里斯年君登賢書領房魁次歲余授徒白某家往來甚殷如斯者五年余失怙讀禮遭家不造由是又少聚談戊寅余蒙鄉薦君冬先入都已卯三場後病瀕危同鄉同年無敢近者君慨然自任凡醫藥飲食親爲調理余病愈中夏始歸君仍留京借館作資斧君可謂勇於進取矣嗣後每至春闈或計偕或同寓者五次丙戌大挑余得教職君膺高等選河員時余爲君惜惜其志未遂

也又爲君幸幸其逮親存可稱仕迎養也君赴山左候補
余家居仍舌耕度日自是以後山川間隔矣乃庚寅歲余
選陳留學時書札往來猶不啻晤對甲午君丁外艱歸里
乙未歲辱臨兩次少慰數年契闊六月送考省垣酌酒談
心不勝依依前數日宵獨夢君起赴任補缺若平生歡而
今已矣竟不可復睹矣君年少又強於余者十倍自愧諸
事皆不如君孰意長者無恙而少者已沒耶弱者尙存強
者竟逝耶天耶人耶不可得而知也君乏嗣多女亦頗爲
君慮然以爲善人必有後乃天定而人竟不可勝耶聞君
亦爲尊君置兆域將行葬事不知已有定否也君之家事

有令弟照管可無憂令三弟雖幼而林誠守家教君亦可
安然於九原矣嗚呼以卅年之知交病不能問死不能往
而哭其何能遣耶爰草此以敘相知之素君其鑒余之忱

司空表聖詩品輯解序

張 鶉
邑人

詩之爲道貌志肖心言近指遠變動不居豈可以言詮哉
子輿氏曰以意逆志是爲得之蓋作者之志不必讀者之
意讀者之意不必作者之志心有所感流而爲詩情有所
通得而爲解觀於春秋名卿之贈答思過半矣非然者守
株待兔豈在乎刻舟求劍劍豈獲乎又況古人已邈陳
迹徒存以一人說一人之詩已難以一人說千百人之詩

尤難之難余嘗謂詩不亡於周室東遷而亡於漢箋唐疏
爲其說愈多而旨愈晦也降及漢唐作者如林爲說益繁
爲體益卑咎歸運會夫豈其然由是言之詩品之作已屬
贅設矧又從而解之乎貂續貽譏蛇添致誚知不免矣獨
是上智之士矢口多風下愚之流不登壇坫惟彼中人雖
亦未逮而猶有志不有以導其心源示厥歸趨保不迷於
所往乎詩品之作司空氏蓋有苦心焉雖然其書流傳久
在人口近來文風日上幾於人各一編然叩其所謂率多
茫然以簡明易曉之言尙且莫辨況古人之名章雋什乎
志在長途而前無老馬心懸珠徑而絲乏蟻穿深爲扼腕

爰取其書謬加詮釋庶幾中材之流由余言而進於司空
氏之言由司空氏而進於漢唐諸家之言由漢唐而進於
三百篇迨至四始六義周貫旁通遊目天外卓筆囊中可
以爲百代之總持可以爲一代之作手則雖取司空氏言
盡束高閣可也矧余之言乎雖取漢箋唐疏盡空所有可
也矧司空氏之言乎道光七年歲在丁亥七月望四日洛
東張鷟星巖識

孟巨源碑陰序

孟金銘
邑人

公諱濤字巨源原籍山西介休元初遷鞏之治北寨子村
至公十有二世矣祖瑩碑記載之甚悉可以不序序公軼

事公至性過人才氣卓越十三四歲從胞叔魯山任思念親常以不能養親及不能顯親爲恨誦讀閒時輒流涕於親訓佩服不敢忘公自識於宜如公碑陰可讀二十一歲取縣首入庠補博士弟子員每試屢屢冠軍舉優者六領薦者四卒未得登賢書論者惜之公設教閭里及主講東周書院皆先實行而後文藝凡遊從之士刮浮華恪守先民風亦蒸蒸日上且其守正不阿老而益堅時宰欲改制書院計有羨餘延衆紳衆默然而公獨以仍舊貫如之何何必改作對拂宰意宰欲傾陷之尋公短問邑某某曰此吾先子之所畏也轉問某某曰是行不由徑非公正不發

憤者也其取重於時賢如此後任新蔡縣訓導甫至縣有工務未免闊派令致書各衙皆爲所動而公獨以非分辭縣土匪不靖人人倉皇莫知所措公乃設法嚴守屬家人曰儻有不虞死焉已矣及平定毫不爲功蓋嘗論之士之學乎道者窮則於以正學術達則於以建事功者也彼世之輕猥便捷固不足言閒有矢志詩書號爲老成一旦臨事決疑中無主張改行易操若公誠所謂上不負吾君下不負吾民中不負吾學者乎所著四書講義課徒草家貧未付劖劘而門弟子多有鈔本藏於家公配宋孺人生文谿能讀父書入府學一領薦生女三孫男一孫女二曾孫

男二曾孫每三玄孫男四玄孫女二公亨壽八十有八孺人享壽七十有三孫銘生晚僅記公之貌未周知公之行事第於家存遺墨得窺一二撮而序之列諸貞珉以昭來茲於無窮云

錄樸麗子跋語

劉瑞律 邑人

先師平泉夫子居又損庵中七歷寒暑著朴麗子九卷越卅三年甲午春又續爲十九卷先師青年嗜學白首不怠用力得力略見於此書其間議論透出一層功夫追進一步大約博觀約取默會自得順情協理期歸至當其於斯世斯民之故成敗得失之機固已惘惘款款不遺餘力矣

平泉先生傳

馮安常 邑人

先生姓馬氏諱時芳字誠之號平泉河南禹州人太師端肅公之裔也世有令德先生生於乾隆壬午性質端厚勤敏有志行年十四受業豫章王省洵爲言聖賢之學心嚮往之及歸博觀諸先儒書反覆尋繹浩若觀海辛丑冬得李穆堂所編陸子學譜讀之欣欣不自禁又讀王文成公集心目開朗如撥雲霧而見青天也弱冠中副車師事同郡王孝山謁洛陽郭堯民堯民許爲忘年交以湯耿相期望父菡洲公以拔萃仕江西先生往省過鄱陽湖遇暴風舟幾覆衆倉皇號呼先生言笑如常或問之曰若不怕死

耶先生曰怕亦無益我討取暫時一點受用耳嘉慶丁酉楚匪內侵至舞陽先生奔告州牧郭公團練守禦一時人心翕然賊不犯境庚申寶豐亂前州牧熊公奉檄防禹敦請先生參其軍駐紮張得去賊巢六十里先生夜於三峯山列薪焚焉賦疑懼不敢北向官軍自東入盡殲之先生初年志在遠大於古來名臣碩士所以淑身善世之道莫不提要鉤元屢試不售年且大乃垂空文以自見嘗曰人之所需爲儒得志則道行於天下不得志則修明聖學昭示來茲豈易言哉甲戌選授封邱教諭薄束脯培士氣同學張晴皋相待益彰年餘丁內艱道光丁亥復選鞏縣教

諭其爲教以本心爲提綱躬行爲著落明體達用爲歸宿來問業者款留之飲食教誨惟恐其去之速也先生慎於接物職分之外不加毫末惟事關學校者爲之不遺餘力或具儀酬之則曰吾職也卒不受初至鞏嚴禁需索羣下頗有怨言居久之乃曰從前貪取不休儻來者亦儻去徒煩惱耳今不妄得亦不妄失自覺便宜許多蓋爲先生所化也丁酉冬卒於鞏年七十六歲前此有秀才某素無賴爲其族母所訟先生痛懲之自是改行及先生卒哭盡哀曰微先生吾幾非人矣先生深造自得洞達確實雖困頓拂逆不以汨其天懷年逾古稀目明耳聰銀鬚朱面進退

偉如與人接樂易和平賢愚皆有餘地然見之者莫不格
心易慮如對神明亦不自知其所以然也所著有論語義
疏樸麗子求心錄挑燈詩話垂香樓詩文稿聞雞隨筆馬
氏心書風燭學鈔來學纂言又校訂四家輯語傳信錄困
亨錄行於世

劉草窗先生傳

馮安常

劉草窗先生潛字季含河南鞏縣人父鳳翥以詩名母段
氏行淑慎載家乘先生童年失恃居喪如禮壯丁外艱三
年不見齒事繼母極得歡心同懷及從弟兄八人皆處之
以友恭家雙河以蘇村爲遠祖所在春秋必先詣祠所會

族人省祖墓孝弟之心出於天性非勉然也先生甫入塾
恪奉庭訓端莊如成人授以小學家禮未嘗視爲糟粕長
就外傳從叔子上胡雨山先生皆器重之爲文發性靈不
屑雕蟲技嗜學如渴藏書不下數千卷莫不手過丹黃反
覆誦惟得其指歸旣冠補博士弟子員慕道敦品之士多
遣子弟執經習禮於先生其教人也若衆飲於河各充其
量雖武夫悍卒漁樵販商亦皆樂聞其論說遠近冠昏喪
祭必詢諸先生而後行作誌銘碑表無媿辭如其人而止
先生和氣謙德人無不親然義所不在尺寸不容相假邑
令滇南李公以差務煩冗延先生分董公局歲饑遊客勢

吏需索不已先生曰民不堪命矣吾不忍見也因賦詩云
差務紛紜亂如絲錢神無色捲靈旂焦心賴慮緣何故盼
到瓜期一展眉遂辭去先生自奉極菲薄祀先必豐必潔
有時物非經已薦不敢入口比寢疾元旦猶強起焚香行
禮元宵亦如之曰吾一息尚在豈可無事於先人疾革整
衣冠遺囑二孫而逝年七十七歲初先生嘗訪馬平泉先
生於鈞陽一見如故越三十年平泉司鐸於鞏致書候先
生先生答禮自是往來唱和商訂不絕及先生卒平泉哭
之以詩有草窗窗外草彌望總淒其之句張君星巖搜羅
先生遺稿輯爲六卷平泉序之曰草窗爲人沈靜充實好
讀書重躬行未嘗斤斤致力於辭學亦不願以文章著名
於世然觀其文根極理要涵泳乎詩書之林優遊乎仁義
之府芟鋤浮囂一歸於醇正秩秩然足爲一邑文獻之徵
而垂光於身後矣同邑劉進士星槎篤行君子也作誌銘
載先生行事甚悉余因本之以爲傳云

來學纂言跋

張鶴年

邑人

憶丁酉冬先生寢疾久鶴舌耕石關村去城數里而近每
五六日一往視焉一日先生輾轉牀第唏噓嗟歎曰來學
纂言爲學之道備矣言罷瞑目移時他無一語爾時已五
內崩摧知吾師弟之緣分將盡矣言猶在耳莫堪回首今

夕復取斯書讀之勲勲懇懇或導以先路或杜其旁趨或誘以婉言或悚以危語左右提攜真如親之於子出入顧復莫能已已且讀且泣至警情篇則涕泗橫流幾不能終篇嘻吾師之爲此也蓋爲其生離有期也而詎意其遂爲兩楹奠夢也乎前此鶴之省師墓也因觀平泉曾有句云極目平泉水平泉總黯然嗚呼其亦何在而不黯然也耶嗚呼其亦何在而不黯然也耶

與清溪老人書

崔嵩喬
邑人

某敬啟清溪老人几下前呈拙作蒙賜斧削點石成金就謝就謝復託范蘭溪勉勗再三示我教言感佩於心莫可

談悉喬賦性愚拙幼耽吟詠苦無師資後得張德長張餘庵二君時相觀摩獲益良多比來德長化去餘庵南遊一二知交率皆專攻八比此中況味竟無人知偶有詠歌獨唱無和蛩吟秋草時鳴時止而已竊意聲律之學不惟言志兼可養心人生感遇中有難言或託物以寄意或對景而抒懷舉凡酒酣拔劍弔古登臨與一切無聊不平之氣悉於詩乎發之當其搦管沈思冥搜孤造亦極難耳忽而徑路絕而風雲通水流花放備饒樂趣有不知手之舞之足之蹈之者是詩之爲物誠騷人之韻事人亦何樂而不爲哉夫詩雖小技取材不富無以供驅使立體不正反以

乖風雅若材既富矣體亦正矣單講格律而不講性情規
唐摩宋縱極形似天真全無亦不能使閱者動心讀者快
意杜老所以上接風騷長留天地者性情故也喬自髫年
學詩迄今年近無聞而才淺學疎苦未名家祇自愧耳邇
來迫於家計屢困秋闈家大人以爲分心舉業見卽喝責
誓欲廢棄而嗜痂成癖靡去復來未知何時得脫樊籠俾
得肆力其中稍窺一二百世後人知嵩洛間尙有其人斯
亦幸矣惟是有道難逢知音特寡牙不逢期誰知高山之
調賈不得韓莫辨敲字之佳意欲春風迎來效光庭之坐
對尙恐瓣香敬祝奉南豐而無由謹具寸素率爾言志未

知夫子之牆亦許鯁生濫廁其中否也臨池神往恭候好
音卽請鈞安喬再拜

詩聖全譜序

尹府張漢

杜氏分源豕韋自少陵詩集大成文士景仰高軌皆曰膳
部衙官屈宋而公陵轢百家世濟厥美詩誠不朽耳迺若
世系源遠流長固莫得而詳焉余讀公本傳上自晉當陽
侯下訖嗣業而近世仇氏前澗浦氏讀公詩傳公系又皆
各有異同自非公後人家有藏譜歷世相傳其綿綿延延
不絕於今者又孰敢妄爲第之歟丁未歲余奉命出守
周南郡郡誌公墓在鞏鞏周南屬旣憑弔展拜成禮遂訪

公裔有若鑠若淵者業儒業余勸建公祠置地若干畝淵等出家所藏譜自嗣業以來世世相繼皆可悉嗚呼公生於鞏卒葬鞏宜其子子孫孫閱千餘年而不替於鞏矣抑前人名當世傳百代皆所自樹立誠無藉於後而子孫克繩紹述爲大宗武生日詩云詩是吾家事人傳世上情熟精文選理休覓彩衣輕又示宗武云覓句知新律攤書解漢牀試吟青玉案莫羨紫羅囊假日從時飲明年共我長應須抱經術已似受文章十五男兒志三千弟子行曾參與游夏達者得升堂鑠與淵爲公裔旣以綿厥世無使駟冀良馬麒麟好兒車輪徒已斲爲公所愾是尤余所厚望

焉

杜氏族譜

杜景熹
邑人

我杜氏族譜著於世者始自唐宰相世系表宋陸氏明錢氏近世仇氏浦氏考據互有異同無足信也先平江公仕岳州工部勅命與譜牒猶存明季遭流寇亂敕命遺失已久本朝定鼎後四十代祖孝則公得譜系一卷於壁隙中至我伯祖相生公我祖光午公又歷百有餘年紙帙蠹蝕自宋元而上剝落幾十之四五會郡伯石屏張公命建文貞公祠呈譜考證參據羣書始成完本熹恐久就散佚因付剗劂以承先人之志我後嗣其共寶之

韓氏雙節婦碑

王詵桂

韓氏二節婦者鞏縣柏廟村已故韓公錦明之配張孺人錦如之配趙孺人也張孺人來歸年十六耳孝由性生人無閒言韓家不中資孺人勤勞罔懈斟酌盡善親珍羞而叔粟米孺人則自甘糠粃之飫矣迨夫子之寢疾也三載醫藥雙親定省孺人一身摒擋堂上幾忘有病子之苦夫子亦藉慰病中之身已而病者不起孺人固欲以身殉也凜翁姑之一言勉飲泣而將事俾二叔率子姪以耕讀孺人更嚴訓諸子以義方其待猶子也無幾微不與己子同也憔悴餘生亦既重罹多難矣而彼蒼所以困厄而玉成

之者則猶未已也蓋未幾趙孺人又以未亡人稱矣趙孺人年甫十九誓死之志百折不回張孺人曰吾有三子延夫嗣不肯一死傷親心子無子而遽死于是二者何居趙孺人曰姒言吾心領矣請姒次子嗣亡者吾與姒居佐事親於是二孺人同處一室仰事俯畜交瘁心力飲冰茹荼共勵貞操二十年如一日也道光三十年張孺人病殆泣語趙孺人曰吾將死矣不獲事尊嫜以終年死且不瞑能補吾闕專賴娣賢趙孺人泣曰敢不祇承姒命如無姒才何家事可無我不可無姒數祈諸神以身代而張孺人竟卒翁姑哭之慟曰冢婦來吾不憂貧二子亡吾不憂養今

已矣夫趙孺人又慟曰妣亡吾形存而心死矣鄰里無不泣者曰賢孝節義止於中壽何也越一載趙孺人乃亦卒其家痛惜之曰事上撫下不啻張孺人也天何奪之速也鄰里哀之也亦與張孺人同蓋二孺人於家少豐後恆商所以賙鄰里者故德之感人也如此初趙孺人事張孺人有加禮或曰何敬畏之甚也曰吾妣非常人也他且無論其在母家也母待前子有異言妣以弱女幾諫母悔卒以慈稱吾儕誰能爲此者吾方步趨之不暇耳張孺人亦亟稱趙孺人曰性勁烈而心虛明視死如歸聞善則拜惟吾無以輔益用是恆自疚耳以故人兩賢之嗚呼古今來兄弟而長幼無序或賢不肖異轍者豈少也哉二孺人娣姒耳節孝相勉久而不渝是真以義合者在易繫辭傳曰二人同心其利斷金同心之言其臭如蘭二孺人可以當之而無愧矣故於令子青陽來請文也振筆書之以爲世勸

衆感碑記

王錫五
邑人

仁足以濟衆生義足以昭世宙蘇人於萬死一生之途而不有其德拯人於呼吸存亡之際而不以爲功此振古豪傑之所爲也然其人往往難之容有之者或數百年得一人焉或數千年得數人焉求所謂一鄉之衆數百之家同德合謀飛仁揚義悉足令人感激無窮者概乎未之前聞

蓋比戶可風其鮮此俗也久矣昔朱眉之亂人民避患出
長安趙伯陽濟活之光武因亟稱焉明季李自成破孟津
難民將奔河北軍官弗納大羣王公親叩軍門願以百口
保無虞卽乘巨艦至南岸濟衆生活數十萬此前史之僅
見者也今捻匪竄鞏爲禍慘矣酷烈之毒殆不忍言有甚
於赤眉李闖者賊於八月十二日入鞏十四日渡洛民號
於前賊逼於後洶洶之狀無所投止哭泣之聲數里相聞
賴趙溝諸君子預備船艦悉濟之北岸以免鋒鏑幸獲安
全者不下數萬人予時攜家共濟蓋親目焉且又爲粥沿
岸以飲食奔逃者問數萬之衆有冒霜刃者乎無有也有

父兄被殺妻子被虜者乎無有也有饑渴無以飲食者乎
無有也問誰之賜皆曰趙溝活我嗚呼至矣伯陽大羣不
過一二人而趙溝數百家何皆伯陽大羣之儔也且非獨
此也十四十五日鞏偃團練人等殺賊千餘賊於十六退
離鞏境而河北軍官又橫肆凌暴索求無厭渡者幾難歸
濟趙溝諸君子贈之以馬許之以金百計曲全乃載之南
岸使得共安家室其歸也有奉金玉以酬者辭勿受有奉
纁幣以酬者辭勿受曰邛洛之衆非親則友並濟吾分也
吾何德之有焉嘻高誼如此以視夫救濟顛危面有德色
其於爲人賢不肖何如耶雖然魏客有言公子有德於人

願忘之也人有德於公子願勿忘也趙溝諸君子既自忘其德矣而被德者不矢勿忘之意其將何以爲心也故大學戚桂枝先生與王君守薪謀協同志欲勒之貞珉以示不朽今屬予爲文以誌之予之謏陋何足以道揚盛美然故知夫救危仁也辭饋義也仁義之道盡孔子所謂吾觀於鄉而知王道之易易不虛矣至同志者之矢勿忘且當銘之肺腑則此文曾何足云

咸豐十一年十二月

程公墓表

張啟元
邑人

嗚呼此邑庠武生程公正民之幽堂也閒嘗過公里訪軼事言人人殊頗疑之既與公哲嗣秋實交扣其詳而疑者

以信蓋公性豪放落落自喜其不羈處殊非禮法所能囿而義利之界人禽之關有定識有定力雖自命學道者弗如也嗚呼公之人若可知若不可知向之言人人殊亦固其所方儼撮其尤者譜爲詩歌藏私篋備觀省而秋實乃以墓表請予曰令先君之生平口碑得其神矣何表爲秋實則曰人亦有言表者何勸也表死以勸生也表其先以勸其後也不肖將玷家聲是懼借以勸我後人君慎勿辭予感其誠濡筆爲之表公諱某字正民生而岐嶷稍長業儒以聰慧稱里閭然不利于文壇效投筆故事去業武居無幾何以精騎射遊武庠公固素封自業武來產中落加

以食指日繁幾幾不能自給皮相者謂其可干以私引置僻處以不通事浼其券不從強之不從益堅陷以金則拂衣去聲色俱厲不一回頭顧道光丁未歲大饑人競射利無不至而公杜門不出足迹不履城市者累月蓋不惟不忍爲并不忍見不忍聞云越二年沒嗚呼公沒矣而不沒者自若也是區區者庸足以表公然以之表公則不足以勸後則有餘矣於是乎書

鞏張府君墓表

周雲

鞏之張性甫府君當同治初元避朝諱而易名曰力真復存其舊名之上一字號曰勗齋性甫則其字也自元世祖

至元時鞏尹曰恩者始自解而家於鞏傳五百餘年不替於中原最爲舊族君之曾祖諱養民祖諱作睿監生考諱凌雲歲貢生著有念餘齋文集希素詩鈔君幼而從父受讀博覽羣籍入邑庠後攻苦益力嘗手錄皇極經世一編時時探索焉性慧直豁達於人無城府中歲以還授徒里門復與聞邑中興措諸事雞鳴旣盥漱集羣弟子授以書晨餐甫竟卽入城治事大而在官之綏乂教養下逮族鄰之瑣瑣婚喪獄訟咸賴君一言以爲斷咸豐十一年捻匪竄鞏君率團練禦之於仙家店老犍坡事後敘勞得獎六品職銜光緒三年大旱君佐縣令設局籌賑其明年躬赴

濬縣購粟在濬邁疾遂卒年七十有一妻康王李皆封安人子二曰耨曰耕女二李森祿劉篤恂其壻也孫德光湛琛仲謙仲友君兄警吾孝廉以文采稱於邑而君以幹濟勝並獲當時之稱捻匪之方熾也患其飄忽靡定兵躡之恆苦不及諸邑能自完者則恃團練辛酉老犍坡之役搯之使不得西非特完一邑之功也丁丑之旱中原赤地千里黔黎走死無所賴耆碩之勇於爲義者以輔官力之不逮而君竟歿於旅次也仲友光緒癸卯恩科舉人余同考時所得士述府君之事迹來請乃舉其犖犖大者以表諸墓府君之卒去今五十餘年矣而其邑人猶言禦寇救荒

二事不置則固鞏人之志也夫東阿周雲表

劉公叔達墓表

董以威
邑人

西東兩漢諸帝分王子弟於各郡國故劉氏一族蕃衍徧寰區如叔達劉公者有可述焉公諱天德其先城北神堤人詩禮名閥科第相望自四世祖琰遷居益家窩公兄弟五人公行三幼時家貧未能從師誦讀然天資粹美孝弟藹然祇父恭兄事事皆率性而出動合準則撫從子輩更有恩義鄉衆以其誠慤無僞每有公務多使肩任少時生計無出族兄某使其隨船料理公藉此嫺於河流並得篙師之術後因自造舟楫漸致饒裕而飲水思源一生不忘

族兄恩養葬輒加意焉夫自學術紛歧風俗敝壞博學能文抱慚或在幽獨四海延譽滋議難免鄉閭人有恆言讀書萬卷不如一縷血誠混沌未鑿老氏云上德不德是以有德下德不失德是以無德朱子註論語有云質美未學如公之爛漫天真不言躬行非其人與從知人性皆善但不能失本來面目不必薛史枕經始克卓立人世也吾願舉劉公之事告天下讀書人使知讀書非學復性爲學又願舉劉公之事告天下不讀書人使知不讀書不害其爲學復性爲學

馬氏心書序

民國
孫友信
邑人

心書者平泉先生傳心之書也非傳先生之心乃千古聖賢相傳之心也以千古聖賢相傳之心寄之先生而先生卽本千古聖賢相傳之心著之書其書中之所言凡道之顯晦治之隆汙民生之休戚無不言之鑿鑿而又合內外渾精粗該本末貫天人動靜不分言行不分窮達不分諸如此類皆發前儒所未發余自光緒癸未從鄉塾得是書歸而讀之有契於心手不釋卷從此拋棄舉業迄今二十九年矣有已解有未解有解而未盡解者略舒愚見逐條僭注數語非盡明晰也然學者引而伸之觸類而長之以書印心以心印書可以得先生之心并可以得千古聖賢

相傳之心矣

清己丑恩科舉人惠夫董先生墓誌銘

孫友信

民國四年八月初二日前清己丑恩科舉人惠夫董先生卒於家余聞耗泫然太息曰哲人云亡吾道益孤矣踰月其仲子蓮航持狀來乞銘余胞弟增生友玖先生壻也又數領先生之教益亦烏敢辭按狀先生諱以威字惠夫號石齋鞏北侯村人曾祖元振祖法儒父長銳有隱德先生朱面長身氣象英異初就傅讀書識大義弱冠入府庠毅然以聖賢自任後從鏡洛劉先生遊得聞陸王之學力提

本心致良知遇紫陽四書集注有舛誤者多辨駁之中年家益窘友教四方徧歷懷孟穎毫閒備嘗艱苦從此學有實得作文每一拈筆汨汨其來警快動人而於聖賢宗旨自然吻合光緒乙酉馮太史視學中州見先生文評爲中州第一遂膺選拔又四年己丑恩科與仲子乃瀛同舉於鄉由是聲價遞增連主汴源河陽嵩陽東周各書院從之遊者不特掇巍科入膠庠莫不虛往實歸與聞斯道共和後絕意仕進杜門不出訓子課孫遠近問學者相繼不絕與人言一依孝弟忠信力持名教嘗恐歐風漸染中華乃滄海橫流砥柱中折噫可慨也已卒年八十有七所著有

學庸心錦論語心傳心花偶燦亦不窺園詩文集元配邵孺人勤儉淑慎生子四長乃涵監生次乃瀛舉人三乃淵四乃澄早逝女三人兩適羅莊一適迴郭鎮孫十二曾孫五俱幼卽以斯年十月十三日合葬先塋之次銘曰
白雲之山高矗矗磅礴鬱積氣清淑先生蓬廬此閒築枕經薛史便便腹濡染大筆驚俗目橋梓同榜耀門族革命黨起國運促先生不肯遂風逐閉戶著書宗王陸一點靈光耿幽獨白玉樓成帝召速舊學遐邇齊聲哭吾道非耶命何蹙守先待後誰與屬猶幸桂子蘭孫簇讀者耕者和且睦洛浦嵩峯祥雲覆勒之貞珉留芳躅

烈婦王氏傳

孫友信

烈婦王氏鞏縣儒童柴體仁之妻也年十八于歸克執婦道逾數月夫亡氏哭之慟勺水不入口翁姑慰喻之乃止夫亡百日身衣衰經哭於夫之墓盡哀歸請爲夫立後翁姑許之取夫弟體禮長子玉振爲嗣氏色喜是夕歸私室沐浴焚香理容衣錦坐縊於牀上及家人知趨解其縊面如生擇期與夫合葬時在嘉慶二十三年十二月十二日也司鐸張公以節凜冰霜給匾旌獎

贊曰婦人之義從一而終故傳列女者巾幗貞節與忠臣義士等今觀烈婦王氏從容就義略無愧色是必百日之

中籌之爛熟所欲有甚於生者存也而縉紳之士坐高堂
騎大馬詡詡然自鳴得意及遇國變輒改節易面靦不知
恥抑獨何哉

烈婦張氏傳

孫友信

烈婦張氏鞏縣舉人濟源訓導張星彩之孫女也幼聆庭
訓識大義及笄許迴郭鎮趙甲木爲妻于歸二年夫亡家
貧與姑紡績爲生堅志守節一日姑不家有族人趙某直
入其室牽氏裙欲污之氏大罵不從俟姑歸涕泣白姑曰
兒不可生矣遂入室自縊姑鳴之官及驗屍已七日猶面
目如生令異之置奸人於法後令呈其事於上上發銀百

兩至光緒甲寅建坊旌表

贊曰余總角時卽聞烈婦殉節事至今未詳其年月大約
其死也以六月其殮也逾七日觀先正諸題詠可證也或
傳烈婦自縊時其夜至聖水母家叩門又入縣控狀房吏
若有見之者夫人魂升於天魄降於地旣死矣焉能爲厲
然如烈婦者冤憤之氣鬱而未伸則其英魂所至不可磨
滅安知其不可信也耶

旌表節孝路母曲孺人懿行序

孫友信

易曰節亨苦節不可貞朱子本義云節固有亨道然至於
太甚則苦矣故又戒以不可守以爲貞也而世之傳列女

者往往喜談洞曾絕脰慘以殉節之事至於尋常守志者或視以爲平常不知處人倫之變非萬不得已不以捐一死爲高惟茹苦含辛艱難備嘗曲盡孝道而力延夫祀者乃爲有合代終之義余於節婦曲孺人有取焉孺人偃邑曲士海之女年二十適吾鞏路公振家爲繼室振家嫻弓馬習武藝越四載而物故僅遺一女孺人撫膺長號不欲生翁姑苦勸之旣念身有遺腹或誕男尙可以綿似續乃從飲食比三月生子德懋孺人且痛且鞠顧復訓誨不少衰事翁姑尤孝謹翁逝時孺人年方壯而姑益老適家析爨與伯季輪養之孺人盡心家計雖艱於奉力求其豐姑

年九十餘性嗜雞魚孺人每飯必曲致之以博其歡心沒後喪葬皆如禮教子有義方嘗令勤儉紡績之餘涕泣訓之曰飽食煖衣不能成立汝若不才汝負吾吾負汝父矣光緒丁丑歲荒家甚窘每謂子曰自古皆有死饑餓何恤無義之財不許妄貪一文是時女適安頭席中山席出外不歸夫弟心懷異計孺人令女嘗居左右以全其節每月餘必令歸省姑並令攜粟米爲給如是者有年後夫弟感格爲之立嗣孫二均修榮修亦循循有法度由是觀之孺人之事翁姑教子女延夫祀而代有終者以視倉卒就義付門祚於一擲者爲何如也宣統二年奉旨旌表又四年

而孺人卒享壽八十有六今年春德懋欲爲母豎碑道左以表貞節乃持狀再拜乞文於余余姻誼也不敢辭謹敘其崖略如此

論曰昔李二曲求顧寧人爲其母立傳至再三終謝之曰文不關於經術政理之大不足爲也余意不然中庸之道愚夫婦可與知能故凡事之有關倫紀者雖家庭之細婦孺之微皆可以維頹風而砥末俗況世衰道微之時鬚眉男子皆改節易面隨時以就功名而敢以巾幗少之哉孺人貞心亮節全始全終固大有裨於名教而余以衰病餘生謹述之而不敢辭者一以明節婦代終之義又以慰孝

子之苦心也

劉節母傳

許鼎臣

劉節母孫氏從余執弟子禮鞏劉生克顯之母克顯以父卒後逾月遺腹生維時節母年二十五也幼不苟言笑嘗從父德魁君家塾中識字能背誦一部論語歸克顯之父元愷元愷以刻苦好學病籲天乞身代竟不起爲斬衰麻經親抱主執功布御柩以葬旣克顯生舅姑每每抱之泣節母會其意則矢之曰好馬不佩雙鞍若生死易心忍再食他家飯者則豈人也哉家故貧躬自操井臼主中饋外每夜而紡績晝而耘鋤事舅姑如子時啜咽無人處及見

舅姑則易色弄孤以娛之舅姑若忘其無子也逾年舅病卒又逾年姑病亦卒左右湯藥累日月不懈痛哭幾皆自絕而克顯少復善病三歲未免懷抱嘗值痘瘟漿水不入咽日數易醫有欲奪其志者爲引推拿人至方著手卽勸兒危苦節不可常則厲聲罵此畜生言吾不忍聞推拿者忸怩去泊克顯八九歲就外傅夜歸必督教誦書日所讀書無爽誤乃已如是者五六年未幾歐風作則謂克顯人亡經死國亡經滅經烏可已聖烏可倍乃啟笥以夫遺性理大全夏峯集取節錄西川要語等授之曰此聖經學鑰也乃子宜鏗而不舍者時董惠夫先生窮居守道命時時

往就正焉節母自力衣食蘄蘄然舅姑卒後每時祭必豐必潔時物所嗜者新必薦薦必誠必敬舅姑葬後徧樹先塋始祖暨高曾三世墓碣又竭力奉事務矜恤三族之老而無養幼而無依者由是家中興然苦心勞意甚年四十髮盡白矣遇鄉族婦女遭值不幸必諭飭以大義故一時守節致孝者率以爲比例有柴貞女未婚夫亡矢歸夫家以守其父母不許母則劉羣從女也力勸之成其志以共和十年夏曆十二月六日卒年五十有七病革執克顯手命以寧直窮勿枉通宜力學尙志吾死瞑目也卒之日里長老臨喪皆泣下不能止貧難孤寡環尸哭如喪私親縣

大夫上其事予褒揚額門閭如例而克顯復以狀至涕泣乞爲傳余撮書其大以式來者

論曰鞏自禹馬平泉先生爲其地校官耳目濡染學者遂多服膺陽明之言以故節母家得藏有夏峯西川等書而董惠夫先生則又本陽明之旨參以近世爲漢人之說者顧其痛聖道之湮塞嶽然奮氣力以觝排淫邪何其壯也固亦可謂強項不逐時趨者矣則夫謂談良知本心之學之流弊爲概不足恃者又豈然乎克顯方將補掾以洛閩而歸諸大中至正以自怡悅於荒涼寂寞此則節母之所當尤慰於九原者也夫苟以節母之守爲守則何學不可成以節母之志爲志則何事不可爲而風靡丈夫乃徧天下皆是克顯勉之勿使窮達利害死生遂得以撓執持不可奪之義而輕當徇之道以負慈母之惓惓是卽所以大報罔極而少紓蓼莪劬勞之痛楚者不然尼山詩書鄒嶧俎豆當日獨寧非兩孤兒子然也哉

王節母墓碑

張嘉謀

鞏縣王節母旣歿十有六年其子今河南通志館協修伯功爲行述介其友張君和堦授嘉謀請旌諸石嘉謀嘗因和堦遊鞏周覽山川樂其風土至輒留逾時和堦方修志黃冶村當隴海道南往來經節母所居青獅山麓循谿憩

柳習聞村父老談舊家軼事喟然傷今俗之異古而靡知所屆僉謂節母孝慈勤儉有古遺風云節母劉氏父篤蘭母氏武生七歲避亂入山獨行烈風雷雨中不迷所往年十八歸王君永儀王君豪於飲試有司冠軍醉失覆試期光緒某年卒節母年二十四子度鉢甫三齡伯功也祖母某憐之甚節母所以仰慰衰姑督勵其孤者委曲艱苦伯功稍長嗜書不時得知家人畏其病也輒假病以賴節母哂而恣之遂以詩名一邑夫弟某夫婦同日卒遺子三女一節母教養婚嫁家亦復興中華民國六年卒年六十歲嘉謀既敬節母懿徽又感於父老今古之慨乃爲銘曰

聖立人極居室大倫敬以終始修己及人我則弗振用夷變夏如水決防橫流潰下禮失求野遊河溯洛温温節母峨峨喬嶽節母有子凜翁遺教曰是克家成惟汝孝姑視藐孤珍逾掌珠汝父汝祖死此蠹書汝弱多病我依爲命節母丞愉慰慈惟敬奔跼千里婉施鞭轡霜晨柿林霽夕花地謂士先志辨志宜早忍死期汝庸慰祖考畢學北洋高等師範制獎中書母憂始減傷其父叔曾未及見顧詔諸孫勿隨俗變眇彼洛口河洄鮪淵神堤中屹近紀堯年家人貞吉國有與立無毀無伐外侮曷極據亂反經羣言衷聖敬慎母儀四國是正維周之東圭景建中父老勿恫

弘我華風

周易集證序

萬自逸

曩在關中友鞏孫韜安皞卿印侯昆季得聞其尊人鏡吾先生賢先生潛心理學閉門卻掃當道亟徵不起晚注馬平泉心書行世寢疾易簣時誦夏峯平泉今何在吾願攜筇從之遊句淹然逝蓋生平學行皈依先生者久且摯也今韜安復以所著周易集證屬爲序考講易之書夥矣隋經籍志六十餘家唐志八十餘家宋志二百餘家雖存者十之二三而人持一說解者愈多經義愈晦今讀先生所爲集證三百八十四爻各係以史事於程理邵數外獨取

例誠齋楊氏約而易守信而有徵吉凶悔吝之義備其在易升之六四曰王用享於岐山吉无咎既濟之九三曰高宗伐鬼方三年克之小人勿用以理形實用斯道也宋阮逸易筌近人吳徽仲周易本義爻徵錢偲周易緯史孫爾宣易象援古可以互相發明竊嘗論之注易忌穿鑿忌支蔓夏峯讀易大旨平泉易引簡質透關要言不煩今讀是書可知其淵源有自矣韜安昆季世其家學刻苦自勵所望緝熙光大俾後之慕三魏者益重天民也

特遣祭劉壽山先生文

維中華民國八年五月二十八日

大總統特遣河洛道道尹楊葆元致祭於

壽山先生之靈曰奉世遺經希文傳業伊島達人淵源家法於鑠先生蘊道守真上軌伊洛超羣軼塵篤生賢子棟家榦國惠流三輔聲馳九域葛稱明志劉勗自新高門彝訓矜式國人養氣葆和勞謙致福冀望遐齡優遊林麓何期宿望遽歎逝川報歎於善德逾於年美蔭成林靈源導水有子亢宗方興未已高高少室鬱鬱長雲爰陳薄醴庶耀清芬

劉公仲雅墓表

張仲友
邑人

鞏自劉星槎先生以通儒倡導後進四方才俊仰慕宗風

履綦相錯門庭內久復圭璋自重濯磨爭先其蜚黃騰達舉孝廉貢拔萃者不具論卽諸生老牖下恆具介節特操爲鄉里推重仲雅公卽其選也公諱萬彬字仲雅星槎公次子性剛毅治身績密少承庭訓礪學勤修了然於聖賢經世大意入泮後值星槎公仕湖南留公綜理家政所學未獲大展然浸淫詩書旣久光遠有耀生平勤儉持家嚴肅訓子禮教二字尤兢兢惟恐少墜家居喜整飭一身上布置井井藏書分類部居標識詳明見衣冠不正身體弗潔者面加譙讓不少貸鄰里憚公寅畏頹風一變子女有過全家環跪懺悔不命起不敢起胞弟季繹好飲酒每過

量公笑責之聞者心懾中年設帳四方門下士恪守矩矱無或菲薄自甘其授徒鄭州也家窘迫子心黼方幼每夕映月讀書上弦則甲夜披誦下弦則丙夜復起肅公教焉公貌瘠瘦軀幹類中人未五旬鬚髮皓白生於嘉慶十五年十月十四日戌時卒於光緒元年十月二十五日享壽六十五歲配趙氏婉婉柔順佐夫持家生於嘉慶十五年十一月二十一日戌時卒於光緒八年十一月十四日享壽七十二歲男一卽心黼無子取心濬次子維湖爲嗣女孫四仲友於公屬從外孫謹采事實之可信者以表諸阡

劉公經言墓表

張仲友

昔年讀先伯父又栗公詩有贈先舅氏經言公五言古風一篇纏綿篤摯情見乎辭蓋其時公設帳鄰村兩老詩酒酬答昕夕過從良朋肝膽觸處呈露雖事過境遷一經迴溯猶想見前輩風流仲友年方孩稚於公警欬色笑茫不記憶然嚮往彌殷覺老成典型類非後生小子所能企及而舊聞放失生平行誼無從津逮爲可惜也客歲冬其從孫鎮華駐軍鄭州兼督辦豫陝晉邊區事擬爲公樹碑墓道以書來屬爲文紀事仲友外甥也爰舉諮訪所得略誌於左公諱心畚字經言郡庠生少隨大父椿園公讀書宛郡學署與胞弟經川互相勉勵祖訓極嚴家庭彝倫幼卽

兢兢致意嗣所業日進立身涉世動中窾要旋與從弟繡
臣同人泮宮名譽噪起早失怙依依慈親尺寸必謹每當
秋冬夜永偕弟言笑帟帷漏深始去泊母氏寢疾以至辭
世歷時數月竭誠盡敬容顏爲之瘦削當椿園公解組後
門內蕭條俯仰多艱經川公服賈粵海公友教四方兼理
家政中經丁丑奇荒斗米寸金興嗟仰屋公每晨負米於
市自食外稍廉其值撮勺分給鄉鄰公德之優一時無雙
性喜詩兼嗜書法嘗與弟子曰書味美於肉特不堪爲不
知者道耳時人歎爲名言配李夫人淑德慈行勤苦持家
嘉耦也公生於道光十六年七月十五日酉時卒於光緒
六年十二月二十二日巳時得年四十有五李夫人生於
道光十七年七月二十四日亥時卒於光緒二十一年九
月初六日戌時得年五十有九丈夫子四維藩郡庠生維
寶邑庠生維溫邑增生出繼叔父經川維安女子三適任
適張適曹孫男七人孫女三人

劉公濬齋墓表

張仲友

吾外家自潞川公以下德業日耀髦俊蔚起顧皆以樸素
謹厚著稱迨舅氏濬齋公出風流跌宕壇坫生色一時章
服儒士隱然奉若祭酒信乎人才之生造物者運會攸關
而祖宗培植久於此覘其微焉友生也晚不及追隨杖履

親聆警效間嘗訪諸父老耆宿悠然想見其爲人爰略述
一二以概生平公諱心原字濬齋伯顯公子星槎公冢孫
生具宿慧舉止不凡爾時崇尚制藝家諷戶誦公於經史
之餘偶爾試筆長老羣駭以自由是試輒冠軍名滿洛下
未弱冠卽齒縣學咸豐辛酉雋拔萃科次年應京兆試遠
近想望丰采以爲駸駸干霄矣而乃文章憎命鴻飛墮翼時
論惜之公稟資晶瑩邊幅秩然見土木形骸者若將浼焉
喜詩賦精書法收藏名人書畫箱厨累累卷帙之富爲桑
梓所不及同時温縣段春湖閣學汜水牛荔庵太史仰慕
雅度過從日密公則履道坦坦年踰強仕猶畏事諸父跬

步維謹中間因大父椿園公出宰湖湘司鐸宛郡公仁孝
性成迭次步趨侍奉以梗楠杞梓之選未克見諸設施僅
於孩養餘暇傳經授徒追憶前徽益爲扼腕公生於道光
八年九月二十八日申時卒於光緒四年八月二十五日
卯時得年五十有一配任夫人生於道光十二年二月二
十二日戌時卒於光緒十六年七月十五日寅時得年五
十有九公亡後夫人恪盡婦職撫孤成立子男二長維典
未婚而歿次維清女四適曲適白適李適張孫男一鎮巖
外甥張仲友謹表

